



Schweizerischer Evangelischer Kirchenbund  
Fédération des Églises protestantes de Suisse



# Cun 40 temas sin la via

500 onns refurma

Federaziuns da las baselgias evangelicas da la Svizra

Dal 1517 aveva Martin Luther affischà sias famusas “95 tesas”.

500 onns pli tard ans vulain nus laschar inspirar da quai: Qualas èn oz nossas “tesas” per l’evangeli?

Dal 2014 enfin 2017 essan nus, persvas ed esitants, glieud da la “cretta veglia” e glieud da la “cretta nova”, vegls e giuvens envidads da responder sco singuls u en gruppas sin questas dumondas: Tge signifitga quai d’ans confidar en Jesus Cristus? Co vivain nus? Co din nus vinavant ses evangeli? Co influenescha el noss inscunter cun auters umans e cun nus sezs? Co daventa el sal, glisch e senn da nossa vita?

Tranter il 2015 ed il 2016 pudais Vus formular vossas tesas per l’evangeli, saja quai en gruppas, sco raspadas, da maniera regiunala u er chantunala. Ina sintesa per l’entira Svizra vegn discutada dal 2017 en las baselgias. La Federaziun da las baselgias evangelicas da la Svizra preschenta lura questas tesas sco essenza da la cretta refurmada svizra sin las occurrentzas internaziunalas davent da l’onn 2017. Fin là vegnan ellas ad accumpagnar nus ed a dar impuls da reflexiuns.

Prendai part, ponderai ensemble, barattai Vossas ideas e las dai part - cun plaschair e confidenza.

## Tema 1

### Taidla! Dieu discurra cun nus ... Nua? Cura? Co?

La Bibla mussa persunas ch’èn en dialog cun Dieu. En quest dialogs udin nus savens da dubis, resistenzas, nunchapientscha e da tema. E da las giadas regna silenzi, il silenzi da Dieu ed il silenzi dals umans.

Il taschair da Dieu durmenta oz blera glieud.

Co stati cun nossa surdadad? Co discurrer oz da quest Dieu che discurra cun nus?

Texts bibliques che gidan a la reflexiun: Exodus 3,1-14; Jeremia 1,4-10; Habacuc 1-2,1-6; Joannes 1,1-18.

## Tema 2

### Leger la Bibla: pertge - e tge hai jau da quai?

Las scrittiras biblicas han accumpagnà ed accumpognan anc adina bleras cristianas e blers cristians en lur vita ed en lur decisiuns. Ellas èn adina stadas in sustegn ed ina directiva. La lectura da la Bibla na s'enclegia betg pli da sai. Saja che la Bibla vegn reducida sin tschertas ideas, saja ch'ella vegn encletga pled per pled. En tuts dus cas na vegn ella betg valitada endretg.

Quala piazza ed impurtanza dain nus vairamain oz a la Bibla? Avain nus pers il plaschair vi d'ina lectura simpla ed enclegentaivla cun ans concentrar be sin il decifrar ses cuntegn? Co pudessan nus oz puspè chattar il plaschair vi da la lectura biblica?

*Texts bibliques che gidan a la reflexiun: Psalm 119,105; Lucas 4,16-22; Fatgs dals apostels 8,26-40.*

## Tema 3

### Quala communitad furma l'evangeli?

Ils Fatgs dals apostels mussan ch'ils giuvnals vivevan en ina communitad exemplarica. Oz sa laschan blers umans inspirar e fascinar da talas communitads. Quellas correspundan però be per part a la vita concreta da la baselgia.

Tge pudain nus gidar tiers al desideri per ina fraternitat vivida?

*Texts bibliques che gidan a la reflexiun: Psalm 133; Fatgs dals apostels 4,32-35; Romans 15,5-7.*

## Tema 4

### È la baselgia evangelica er catolica?

Ils protestants sa defineschan savens en opposiziun al catolicissem, ma questa maniera "d'esser counter" suletta na declera nagut. Il protestantissem sa basa sin in model naziunal, entant che oz è la globalisaziun ina realitat.

Sche “catolic” signifitga al medem temp “cuntinuitad da la cardientscha che na po betg vegnir destruida” e “cumpigliond tut ils pievels”: Co po nossa baselgia evangelica – ensemes cun outras baselgias – esser perditga da la dimensiun universal da l’evangeli? Tge vulain nus dir oz areguard la catolicidad da nossa baselgia?

*Texts bibliques che gidan a la reflexiun: Jesaja 56,1-7; Lucas 10,1-11; Efesers 2,11-22.*

## Tema 5

### Esser liber? Gea – ma co?

“Il cristian è in liber signur sur da tuttas chaussas e n’è suttamess a nagin; il cristian è in servitur en tuttas chaussas ed è suttamess a mintgin”, ha scrit Martin Luther. Tge è l’impurtanza d’ina tala decleraziun oz? Quala responsabladad en quest mund surpigliain nus pervia da quella libertad? Tge libertad tschertgain nus visavi a las sfidas, a las limitas ed a las malencletgas da questa noziun?

*Texts bibliques che gidan a la reflexiun: Exodus 20,1-17; Joannes 3,1-8; 2.Corinters 3,17-18.*

## Tema 6

### A tge ston ins resister ozendi en il num da l’evangeli?

Il verb “resister” tutga tar quels verbs che han constituì e construì il protestantissem. Iils refurmaturi han resistì en il num da l’evangeli a tutta dominanza ed arroganza politica che ha empruvà da limitar la libertad da la conscientia. Er oz datti tala pussanza e controlla da la libertad – schebain er en otras furmas. Qual pled e quala furma da resistenza dovrà quai per nus oz?

*Texts bibliques che gidan a la reflexiun: 2.Samuel 12,1-7; Matteus 4,1-11; Revelaziun 13.*

## Tema 7

### “Stà si e chamina!” Tge di quai ad in uman en in quartier da povers, en ina chasa da tgira, tge di quai ad insatgi da mia famiglia?

Quai è stà a Jerusalem sper la porta da las nursas sut in dals portics dal tempel che Jesus ha ditg quest pled deliberant ad in um paralisà. Oz datti blers lieus, nua ch’ins sa senta

paralisà, immovibel u serrà en. Esser senza lavur, esser vegl, esser malsaun, la tema per il damaun, la marginalisaziun, la panica da n' esser betg pli a l'autezza.  
Co pulain nus tuttina dar vinavant queste pleuds da speranza da l'evangeli?

*Texts bibliques che gidan a la reflexiun: Ezechiel 37,1-14; Joannes 5,1-9; Fatgs dals apostels 3,1-10.*

## Tema 8

**“Betg far quitads”; “guardai ils utschels dal tschiel”; “betg mantunar...” Veggan queste pleuds anc tadlads en ina societad che consumescha e pluna si ritgezzas?**

Il messadi deliberant da la grazia da Dieu ans segirescha che nus n'avain betg da far quitads per il damaun. Vairamain quinta be la relaziun cun Dieu, e tras el cun noss conumans. Ils protestants, deliberads da la tema per lur salit, han pregià modestia. Oz quintan l'avair ed il possess per esser renconuschì socialmain.

Tge mettain nus cunter ad in tal pensar da consum?

*Texts bibliques che gidan a la reflexiun: Matteus 6,19-34; Marcus 10, 17-27.*

## Tema 9

### Datti dapli che in Dieu unic?

La globalisaziun religiosa n'è betg nova. La Bibla sezza è naschida en in context interreligius. Da las giadas è ella s'orientada vi dad otras religiuns e da las giadas las ha ella cumbatti. Questas tensiuns pon ins badar tar la lectura biblica.

Vegg Dieu encletg adina en medema maniera? Stuain nus oz tschertgar il “pli pitschen numnader communabel” da tut las religiuns? Tge è il spezial da l'evangeli da Jesus Cristus? Tge vulain nus mantegnair sco specific da la cretta cristiana senza refusar il dialog? Nua èn las necessitads, las schanzas e las limitas d'in tal dialog?

*Texts bibliques che gidan a la reflexiun: Deuteronomium 6,1-9; Joannes 14,1-14;  
Fatgs dals apostels 17,16-33; 1.Corinters 8,1-6.*

## Tema 10

### Cura m'ha Dieu dà l'ultima giada in segn?

La cretta è en emprima lingia ina relaziun persunala cun Dieu. Al cumenzament da questa relaziun stat Dieu. Ma per mintga relaziun dovra quai dus. Ella viva da l'aspectativa e da la confidenza. Ins di savens ch'ina relaziun d'amur dovria cumprovas. Propi? U dovra ella plitost segns? Quals segns?

Cura m'ha Dieu dà l'ultima giada in segn? E jau, cura al hai jau dà in segn? Tge vulain nus oz affirmar, mussar e parter per exprimer nossa relaziun cun Dieu?

*Texts bibliques che gidan a la reflexiun: Hosea 2-3; Chanzun da las chanzuns; Joannes 20,11-19.*

## Tema 11

### “Prenda in uffant al maun / per al manar a...” Nua vairamain?

La fidelitat da Dieu atras las generaziuns era per ils refurmaturi e surtut per Joannes Calvin ina valur custaivla. Per ils protestants era quai impurtant da dar vinavant lur cardientschas e lur catechissem.

Nus però, nus avain savens il sentiment – forsa er exagerà? – ch'i na gartegià betg a nus da dar vinavant nossas persvasiuns a las generaziuns giuvnas.

Tge vulain nus surdar a noss uffants oz e damaun, en in mund che sa mida e che ha pers valurs stablas?

*Texts bibliques che gidan a la reflexiun: Exodus 34,5-6; Psalm 33,18-22; Marcus 10,13-16.*

## Tema 12

### Pertge hai jau fadia da discurrer da Jesus Cristus?

Normalmain na mettan ils protestants en Svizra lur cretta betg vi dal zain grond. Els la vivan da maniera discreta. Ma oz è il cristianissem cun tut sias confessiuns daventà ina religiun minoritara. Adina damain umans enconuschan la Bibla ed il cuntegn da l'evangeli. Perquai essan nus dumandads da stgaffir novas manieras d'inscunter cun noss conumans.

Co pudain nus surventscher nossas retegnientschas e proclamar il pled da la vita en ina societad da communicaziun secularisada?

*Texts bibliques che gidan a la reflexiun: Exodus 4,1-17; Matteus 28,16-20; Lucas 9,18-20.*

## Tema 13

**“Jau crai en Dieu il Bab, il tutpussant”; ma Paulus ha scrit: “Dieu ha elegì quai ch’è debel en quest mund”. Tutpussant? Debèl?**

Las cardientschas discurran d’in Dieu tutpussant, creatur, signur da tut las chaussas, alfa ed omega... Ma en la Bibla resenta Dieu er la deblezza e l’umilitad da l’esser uman en la persuna da ses Figl Jesus Cristus che – privà da tutta pussanza – mora vi da la crusch. Sia levada è in segn per la forza da la vita. L’uman emprova surtut cun la tecnica da schlargiar vi pli sia pussanza per dominar il mund.

Co pon ins oz a regard talas pretensiuns exageradas da pussanza far encleger l’idea d’in Dieu vulnerabel?

*Texts bibliques che gidan a la reflexiun: Psalm 113; 1.Corinters 1,18-25; 2.Corinters 12,6-10.*

## Tema 14

**Nagina tema da l’ultim giudizi?  
Tant meglier! Ma qual giudizi  
rumpa u paralisescha nus oz?**

Il temp medieval han ils cristians giù temà da l’ultim giudizi e da l’auter mund (mussà bleras giadas vi dals portals da baselgia). La refurma als ha deliberads da questa tema.

Tge temain nus oz? Tge decida oz sur da vita e mort? Ha l’evangeli ina funcziun deliberanta en quest regard? Visavi a giudicats che suppriman e destruieschan: Tge pudain nus oz proclamar?

Tge pudain nus dir, tge pudain nus far?

*Texts bibliques che gidan a la reflexiun: 1.Rais 3,16-28; Matteus 7,1-5; Joannes 8,1-11;  
Galaters 2,16-21.*

## Tema 15

### **Jesus, noss Salvador! Salvader da tge?**

La refurma ha mess il salit da l'olma en il center da la cretta cristiana. Al temp da Luther era la tema da la condemnaziun eterna omnipreschenta.

Tge ans smanatscha oz il pli ferm en noss pli profund intern? Tge embarassa e fa tema a nus? Da tge ha Jesus salvà nus? Qual salit da l'olma vulain nus proclamar?

0

*Texts bibliques che gidan a la reflexiun: Psalm 6; Matteus 8,23-27; Lucas 19,10*

## Tema 16

### **La levada a nova vita – tge è quai?**

Ils emprims cristians han mess la levada a nova vita en relaziun cun la giustia. En il temp medieval han ins plitost mess la levada en in context cun il salit da l'olma. En l'actuala mania da la giuvenilezza ed ils quitads per l'agen corp duai la biotecnologia stgatschar la mort. L'idea da la reincarnaziun è fitg derasada.

Tge pudain nus dir davart la mort ch'è inevitabla e davart la victoria da Dieu sur da la mort?

*Texts bibliques che gidan a la reflexiun: Daniel 12,1-3; Joannes 20,24-29; Revelaziun 20,1-5*

## Tema 17

### **Co vess dad esser in patrun evangelic? Ina sindicalista evangelica? In dischoccupà evangelic, ina lavuranta evangelica? In pensiunà evangelic?**

Per Luther aveva il mastergn ina grond'impurtanza sociala. La noziun professiun regorda che mintga lavur è in sa participar vi da la societad.

Qualas relaziuns datti tranter mes engaschament professiunal e mia cretta? Datti in management cristian? In activissem sindical cristian? Tge impurtanza han dumondas religiusas en in' intrapraisa?

*Texts bibliques che gidan a la reflexiun: Amos 8,4-8; Matteus 20,1-16; Filemon; Jacobus 5,1-6.*

## Tema 18

### Vita pli svelta: nagin paus, prescha permanenta. Nua èn ils dis da paus per pudair traire il flad?

La tradiziun cristiana metta il settavel di, il di da paus biblic, sin ina dumengia. Ma l'economia da "las 24 uras" e da "l'emna da set dis" absorbescha la dumengia vi pli. Insperescha da pudair qua tras stimular il consum. Nus daventain adina pli activs, nus pratitgain il "multitasking" e nus surchargiai noss uffants cun activitads. A medem temp crescha il basegn per autoreflexiun ed il temp per la meditaziun davart il senn da la vita. Co giain nus enturn cun questa cuntradicziun?

*Texts bibliques che gidan a la reflexiun: Genesis 2,1-2; Psalm 127; Matteus 12,1-14.*

## Tema 19

### "Bitta tes paun en l'aua!"

Qual paun?

Qual' aua?

Cun quel vers envida nus il Predicatur dal Vegl Testament d'esser generus e betg egoistic. Oz ans surmanain nossas temas da segirar nossa vita, da mesirar "noss paun", da controllar tut, d'evitar mintga malsegirezza e da calcular las investiziuns e lur renditas. Datti alternativas?

*Texts bibliques che gidan a la reflexiun: Predicatur 11,1-4; Marcus 8,34-37; Lucas 9,13-15*

## Tema 20

### "Empleni la terra e la suttamettai a vus." E sche quai periclitescha nossa terra?

Quest vers da l'emprim chapitel da la Genesis sto savens servir per giustifitgar l'explotaziun da la terra tras l'uman. Empè da servir a la terra e da la cultivar e da pertgirar la vita, sco ch'il segund chapitel metta a cor, sa consideresch la l'uman sco regent da tut. Oz vesain nus las consequenzas e las limitas da questa dominaziun: midada dal clima, polluziun da l'ambient, malgiustias socialas e bler dapli.

Sche nus crain che la Bibla cuntegnia il pled da la vita:  
Tge proclamain nus? Sco agin nus?

*Texts bibliques che gidan a la reflexiun: Genesis 1,26-31; Genesis 2,15; Psalm 8; 2.Corinters 5,17-19; Colossensers 1,15-20.*

## Tema 21

**La Bibla discurra da pastgiras, salas da nozzas, d'ina citad glischanta e d'in banchet da festa per descriver il reginam da Dieu. E co vesain nus quest reginam?**

En la Bibla datti bleras metafras, sumeglias e maletgs che descrivan il reginam da Dieu. Questa lingua plaina da fantasia na vul betg ans far emblidar il mintgadi. Al cuntrari, ella sa referescha ad el.

Correspundan quests maletgs anc al temp dad oz? Pon ins p.ex. giustifitgar oz anc l'imaginazion d'in banchet da festa, nua che la corpulenza d'ina vart è daventada in problem da la sanidad publica e nua che d'autra vart passa 800 milliuns umans pateschan fom en il mund entir? Co badain nus il reginam da Dieu en noss mintgadi e co al exprimin nus?

*Texts bibliques che gidan a la reflexiun: Psalm 23; Matteus 13,1-10; Marcus 4,26-32; Revelaziun 21.*

## Tema 22

**Fa Jesus anc adina miraclas?**

Miraclas vegnan en la Bibla savens descrittas sco segn da la libertad, da la suveranidad u – curt – da la grazia da Dieu. Ils refurmatur han mess l'accent sin la cretta vivida en la vita dal mintgadi ed han exclus mintga furma da superstiziun e magia. Oz ans suttamettain nus als sforzs dal mintgadi. Ma a medem temp ans sentin nus attratgs dal straordinari.

Co badain nus l'influenza da Dieu en nossa vita? Essan nus abels da pertschaiver ina miracla? Tge schain nus oz a las ovras da Dieu?

*Texts bibliques che gidan a la reflexiun: Psalm 92; Joannes 11,1-53; Fatgs dals apostels 5,12-16.*

## Tema 23

### Il Spiert Sontg: orcan u suffel?

En la Bibla al inscuntrain nus sco suffel, sco fieu, sco confortond ed encuraschond, sco buf andetg. N'è il Spiert Sontg betg chapaivel? È'l en nus u ordaifer da nus sezs? E pertge è el vairamain sontg? Per ils refurmatars, e surtut per Calvin, era el da grond' impurtanza. Oz avain nus savens sentiments curius envers il spiert, ils spierts ed il Spiert Sontg. Co pudain nus chattar puspè l'inspiraziun che sorta dad el?

*Texts bibliques che gidan a la reflexiun: Genesis 2,1-2; 1.Retgs 19,9-14; Joannes 20,19-23; 1.Corinters 12,1-11.*

## Tema 24

### La trinitad: 3D-High-Fidelity ?

Dieu è Bab, Figl e Spiert Sontg. Questa cardientscha cristiana ch'è vegnida sviluppada en il decurs da numerus concils da la baselgia veglia, ha manà a problems d'interpretaziun e da las giadas er a conflicts. Per insaquants è la trinitad in dogma nuncler ed antiquà. Auters vesan en quel ina possibilità da mantegnair il misteri da Dieu che nagin na po definir. La noziun vegn mal encletga. Ma el vul exprimer surtut che Dieu unescha en sai relaziun, amur e communitad. Co pudain nus oz renconuscher in Dieu ch'è sur nus, dasper nus ed en nus, e che envida nus adina puspè a la cuminanza?

*Texts bibliques che gidan a la reflexiun: Joannes 14,8-26; Joannes 17,20-23; 2.Corinters 13,13.*

## Tema 25

### Il mund è daventà ina pitschna vischnanca, hai num. Co ans vegnin nus pli datiers?

Tgi è mes conuman en ils temps da l'internet e da l'Airbus A350? Il svilup tecnic ed electronic ha midà cumplettamain nossas ideas da temp e spazi. Dapertut pon ins installar colliaziuns entaifer fraciuns da secundas.

Ma co poss jau evitar d'emblidar mes vischin, nua che la lontananza è talmain daspera? Tgi vegn ad esser noss pli strusch conuman en ils temps da la globalisaziun?

*Texts bibliques che gidan a la reflexiun: Genesis 11,1-11; Leviticus 19,33-34; Lucas 10,25-37.*

## Tema 26

### **Jesus Cristus, Segner Jesus, Figl da l'uman, maister, servient, Figl da Dieu... Quala indicaziun mettain nus suenter "Jesus"?**

En il Nov Testament datti blers numbs per Jesus. Savens derivan quels dal Vegl Testament.

Els sclereschan differentas fassettas da la persuna da Jesus.

Tgi renconuschain nus en el? Qualas qualitads attribuissan nus ad el? Quals numbs correspundan surtut ozendi?

*Texts bibliques che gidan a la reflexiun: Ezechiel 2,1; Marcus 8,27-30; Marcus 15,39; Joannes 1,29*

## Tema 27

### **A quals mals socials ston ins resister?**

Adina puspè legiain nus en las scrittiras biblicas dals quitads dals povers, supprimids, esters, stgatschads, da quels en la miseria. Ils crettavels vegnan dumandads da s'engaschar per els. Tals appels èn ina part impurtanta da la cardientscha da nossa tradiziun refurmada.

Quals mals turmentan oz nossa societad? Cura e nua è mes engaschament il pli necessari?

*Texts bibliques che gidan a la reflexiun: Deuteronomium 10,17-19; Matteus 25,31-46;  
Lucas 16,19-31.*

## Tema 28

### **"Jau crai en la cuminanza dals sontgs", hai num en il Credo. Ma tgi è sontg?**

En il cristianissem è la nettezza morala savens stà in punct central: Sontgs èn quels umans ch'èn senza mendas, ils innocents, quels che stattan da la buna vart ed èn spezials. La noziun da la sontgadad vegn duvrà per personas che s'engaschan en maniera extraordinaria per la vita e per la cretta. I dat damai motivs avunda per avair ina conscientia nauscha. Tuttina: Cur che Paulus sa volva als cristians a Corint che na viven betg gist en maniera idealia, addressa el sia brev "a tut ils sontgs".

N'essan nus damai betg sontgs, cur che nus ans numnain uffants dal sontg Dieu? Tge signifitga lura l'appel a la sontgadad?

*Texts bibliques che gidan a la reflexiun: Leviticus 11,44-45; 2.Corinters 1,1-2; Ebrers 11.*

## Tema 29

### Nua è il tschiel?

Nus vesain en Dieu il “creatür dal tschiel e da la terra”.

E Jesus envida d'urar: “Bab noss en il tschiel”. L'imaginaziun d'in Dieu che sesa sin niveis è anc adina derasà. Ma noss temp raziunal e modern ha demontà quest maletg.

Stat Dieu propi en tschiel? U insanua auter? U nagliur? Han ins translocà Dieu? Dovra l'uman in “utrò” per pudair pensar e viver? Co pon ins stimar quest mund senza sa serrar e senza empraschunar Dieu en quel?

*Texts bibliques che gidan a la reflexiun: Psalm 115,1-3; Matteus 6,9-10; Matteus 18,20;  
Fatgs dals apostels 1,9-11.*

## Tema 30

### È disfotuna in chasti da Dieu?

Il protestantissem crititgescha l'idea d'ina vendetga divina. El è fitg precaut cun attribuir tscherts eveniments a Dieu. El approvescha il svilup medicinic che ha mussà tant il caratter arbitrari da malsognas, sco er lur derivanza genetica e dependenza dal cumportament. El refusa la cretta al destin. Tuttina audan ins adina puspè la dumonda: “Tge hai jau fatg al char Segner per meritari da quai?” Ed en las scrittiras bibliicas hai num che Dieu possia “guarir”.

Co pon ins acceptar ils eveniments disgrazius da la vita? Tge ans vulan quels dir?

*Texts bibliques che gidan a la reflexiun: Genesis 9,8-17; Giob 1,9; Lucas 13,1-5; Joannes 9,1-7.*

## Tema 31

### “Vus essas il sal da la terra. Vus essas la glisch dal mund!” Co pudain nus encleger quai?

Jesus n'ha betg drizzà queste pleuds ad ina elita da crettaivels, mabain a tuts che al tadlavan. El ha constatà (“Vus essas...”) e n'ha betg cumandà (“Vus avais dad esser...”). Dar gust a la terra e glisch al mund.

Il cristianissem è savens stà pionier en dumondas socialas. E surtut ils protestants han qua contribuì bler.

Quals èn oz ils novs champs d'activitat? Tge signifitga quai d'esser sal e glisch? Tge ans di quai davart Dieu?

*Texts bibliques che gidan a la reflexiun: Jesaja 58,6-8; Matteus 5,13-16; 2.Corinters 3,2-3.*

## Tema 32

### Sola gratia, sola fide, sola scriptura, solus christus, ecclesia reformata semper reformanda, soli deo gloria... En lingua dad oz?

Il protestantissem ha consolidà questas maximas impurtantias ch'en stadas decisivas per sia tradiziun, sia teologia, sia spiritualidad e sia vita ecclesiastica. Al temp da la refurma protestanta signifitgavan queste principis ina midada profunda.

Vegnan els oz vairamain anc chapids? Als enclegiain er nus? Èn els impurtants per nus, per nossa baselgia, per noss conumans? Co pon els vegnir formulads, per che questas confessiuns sajan chapiblas per tuts?

*Texts bibliques che gidan a la reflexiun: Psalm 96,1-6; Fatgs dals apostels 2,1-11; Fatgs dals apostels 28,30-31.*

## Tema 33

### “Ils ultims vegnan ad esser ils emprims.” – Vai anc?

En la religiun vegn savens ditg ch'ils povers ed umiliads vegnian drizzads si en tschiel. Il cristianissem viva d'ina speranza che vegn cundecisa da l'istorgia. Il vegnir dal reginam da Dieu vegn accumpagnà da midadas en il mund, quai vul dir en la societad, er en la “societat cristiana”, damai en la baselgia.

En noss mund restan ils ultims savens ils ultims, ed ils emprims restan ils emprims.  
Tge signifitga quai d'esser l'emprim u l'ultim? E tge signifitga quai en il senn da Dieu?  
Nivellescha la cretta cristiana tut?

*Texts bibliques che gidan a la reflexiun: 1.Samuel 17; Fatgs dals apostels 2,42-47;  
Filippensers 2,6-11; Jacobus 2,1-7*

## Tema 34

### Tgi ha tema da daventar vegl?

En ils temps bibliques avevan ins respect dals umans “vegls e saziads da viver”. Oz è quai gist viceversa: La giuventetgna vegn glorifitgada, er anc en la vegliadetgna. Umans vegls vegnan resguardads sco ina chargia per la sociedad. La vegliadetgna e la dependenza che nus colliaian cun quella ans fan tema. Mussa la Bibla d'avair tgira da las relaziuns tranter las generaziuns? Dad umans en auta vegliadetgna? Dad umans en la saira da la vita?

*Texts bibliques che gidan a la reflexiun: Genesis 25,5-11; Exodus 20,11; Psalm 90,1-12;  
Predicatur 11,9-12,8.*

## Tema 35

### Pon ins ludar Dieu senza spetgar ina recumpensa?

Ils psalms envidan nus da ludar Dieu e d'exprimer uschia nossa renconuschientscha. Il laud stat en il center da la spiritualidad biblica.  
Cumprain nus uschia che la proxima uraziun vegnia exaudida? Ludain nus Dieu “per nagut”? Tge en mia vita “merita” laud ed engraziamenti?

*Texts bibliques che gidan a la reflexiun: Psalm 146; Efesers 5,18-20; Revelaziun 5,11-14.*

## Tema 36

### Datti propri nagins umens e naginas dunnas pli?

„Là n'è ni gidieu, ni Grec, ni sclav, ni liber, ni um, ni dunna; perquai che vus essas in en Jesus Cristus.“

Quests pleds che l'apostel Paulus ha drizzà als cristians en la Galazia èn revoluziunaris. Els annulleschan quai ch'ins è da las giadas fitg impurtant e che constituescha nossa identitat:

la cultura, il status social e la differenza dals sexs. Nus vivain en in mund, nua che manifestaziuns d'identitad - surtut quellas culturalas e religiusas - serrat ora savens. A quala maniera d'ospitalitat e fraternitat ans cloma l'evangeli?

*Texts bibliques che gidan a la reflexiun: Genesis 12,1; Jesaja 43,1; Galaters 3,26-29.*

## Tema 37

### Tge mida Jesus en mia vita?

Ils evangelis mussan la forza da midada dals pleuds da Jesus. Numerus èn ils rapports davart la vita d'umens e da dunnas, che tras Jesus, ses messadi, sia mort e sia levada a nova vita è vegnida midada, vulvida enturn, drizzada si ed orientada novamain. Co ha Jesus midà mia atgna vita? Tge pudain nus dir davart questa forza da midada? Qualas midadas èn necessarias en mia vita ed en la vita sociala?

*Texts bibliques che gidan a la reflexiun: Jona; Joannes 2,1-11; Romans 12,1-2; Efesers 4,20-24.*

## Tema 38

### „L'evangeli per tabaloris“ – co pudess quel vesair or?

Jesus, ils apostels, ils babs da la baselgia, ils refurmatur: Els han vulì far accessibel l'evangeli per tut ils umans. En la societad cristiana è quai savens capità tras l'instrucziun e catechessem. Oz ha be ina pitschna minoritad dals uffants instrucziun da religiun. Blers da noss contemporans na conuschan ni la Bibla, ni il messadi da l'evangeli.

Quala è per nus la quintessenza da l'evangeli? Co pudessan ins – senza banalizar – communitgar en maniera simpla ses cuntegn?

*Texts bibliques che gidan a la reflexiun: Jesaja 32,1-4; Lucas 10,21-22; Lucas 24,25-27;  
Joannes 8,31-32.*

## Tema 39

### “Betg avair auters dieus sper mai.” Quals dieus vegnan oz venerads?

Ils “Diesch cumandaments” che Moses ha survegnì al Munt Sinai, èn terms impurtants per traversar il desert e per mantegnair la libertad: Lur finamira è d’evitar la sclavaria en mintga furma. Ma ils emprims cristians che refusavan da seguir la religiun da l’imperatur roman, valevan sco ateists. Suenter Jesus ha er Martin Luther ditg: Nua ch’igl è tes cor, là è er tes Dieu.

Quals èn ils dieus en nossa vita, en noss mund? Tge èsi da refusar vi da quests dieus. Tge duain nus proclamar?

*Texts biblics che gidan a la reflexiun: Deuteronomium 5,1-22; Joannes 15,11-17; Galaters 4,1-7.*

## Tema 40

### La dumonda che manca

Durant 40 emnas avais Vus legì dumondas ch’èn forsa fitg sumegliantas a Vossas atgnas. Ma quala dumonda che occupa Vus actualmain, n’è betg vegnida avant? Quala dumonda vulessas Vus parter cun auters? Quala da Vossas dumondas sto anc vegnir discutada?

Mias ponderaziuns..., inspiraziuns...

Las DUMONDAS che m’han manà fin qua...